

PETEDON DADA UAID II

Tauamboen chiaid

1 ¹Petedo Simon caid nebi. Abëd icquid yec aton yuambo icsho Esuquidistun: —Ĕmbi naid chuibeneta —caidquio nebi. Ĕbëdta Esus tantiaquido mibi neque. Mimbi iste dada uanu. Abi tantiaquido cuidmenquio icnuec abided cuidadaid Esus tantiasho Nuquin Papan bëdamboen isaido nuqui nec. ²Ĕbëdta Esus tantiaquido icsho mibi tantiaquin Nuquin Papa chianembi naden. —Aidon Esus tantiatsëcsho mibëdta Esus tantiamequin bëdambo icme, Papa. Aido bëdamboen isquiota, Papa —quequin Nuquin Papa chianembi.

Nuquin Papan bëdambo icmete chiaid

³Comapenen tantiaquid icquin Nuquin Papan namiac aidën chiaid niac-niacte bunenquio yec Esus tantiaquido bëdamboec tabadec unësash Nuquin Papa yacno tabadendac. Abipadquid utsi nibëdnuc bëdamboshë icquid icquin Nuquin Papan Esus tantiamiaido nuqui nec. ⁴Abipadquidquio Esusën chiondacpadomboen abi tantiaquidobëdta Nuquin Papan aton Mayan tabadmequin bëdambo icmec. Aden abipadquio icnuc bëdambo icmiac icsate bunenquio yanec nuqui bëdamboec tabadec. Utsibo icsateuidi bunec icsaquionobi nuqui bëdamboec tabadendac.

⁵Aden Nuquin Papan Esus tantiamiaido yec dayacquio yacbimboec ënëdenquio yec bëdamboec tabadnuna. Adecbidi Nuquin Papan chiaidquio tantiec tabadnuna. ⁶Aden Nuquin Papan chiaidquio tantiec nuqui icsate bunacpadec icsainquio icquin mëmununa. Aden mëmunquid yec nuqui chieshënnquidbëdi chieshënnanenquio yec chieshtoenquio icquin Esus tantianuna. Nuquin Papatsen tantiec bëdamboec tabadnuna. ⁷Aden Nuquin Papabëdta Esus tantiaquido yec nashunanquionona. Adec nashunanquioquin Esus tantiesabo tantianuna. ⁸Ĕmbi chuiboedtedi nabanquin chieshtoenquio icquin adenuidi nanuna. Aden naquin Esus bëdiactsëc tantiatsëcboedëmbi chieshtoenquio icquin nuqui Esus tantiaquiotsiac. ⁹Ĕmbi chuibocpadomboen naisa pamumëdacbimboec iquec. Adquidon: —Aton Mado Esus tantiasho icsaid ucuacbimboecnuc Nuquin Papan nuqui bëdamboen isec —queboedombi bëpiscudquin tantienquio yanec. ¹⁰Ĕbëdta Esus tantiaquido mibi neque. Tanta. Mibitedi chuinu. Ĕmbi aden chuisho tantiash chieshtoenquio icquin Esus tantiec bëdamboec tabadnuna. Adec tabadquin naden nuqui tantiendac. —Ĕndenquimboshë ëbi tishabi icnuc ëbi caic: “Esus tantiamendambi,” quequin ambi chiampicpadomboen Nuquin Papan

nëbi tantiamiac Esus tantiabenombi
—quequin nuqui tantiendac. Aden
tantic Esus tantienquo icquid nuqui
yanenquo ictsiac. ¹¹Adec bēdamboec
tabadash unēsacsho: —Ēbi tantiaquid
mibi neque. Ēbēdi tabadec cho
—queshun ambi namiacno abēdi
tabadmequin Nuquin Icho Esuquidistun
nuqui bēdambo icmendac padpidec
unēsenquo icnuc. ¹²Ēmbi aden
chuiboedtedi mimi tantiondac. Aden
tantiabosh Esus tantic mibi bēdamboec
tabadcuenondac. Aden mimi
tantiondaidi mibi
chuided-chuidedendambi. ¹³—Nëbi
unēsendabi —queboedi ēbi unēsabi
yacpadembi mibi
chuided-chuidedendambi. ¹⁴—Adēnquo
mibi unēsendac —quequin Nuquin Icho
Esuquidistun chiacpadēn nëbi unēsebi.
¹⁵—Ēbi unēsan ěmbi chiondaid ma
bēpiscudenquo icnu —queshun mibi
chuiquin dada uanu.

Nuquin Papan Esus chiaid

¹⁶¿Muaquindambi mibi Esus
chuidionda? Padenquo. —Nadatiambo
icquin nabanquin Esusēn
ismedenepondash. Adquid yec abuc
nidnush: “Padpidec nidaidēn
choaindabi,” quepondash Esus
—¿quectabi muadionda? Padenquo.
Ēmbimbo isondaidquo mambi mibi
chiondac. —Nēid con Madombo nec
—quequin Nuquin Papan ismiac Esus
isondambi. ^{17,18}Nadquo iccondash.
Macuēsh dapan decatatoash Esus
bēchamauanquie iccondash. Adnubien
Nuquin Papan: —Con Madombo nec.
Ēmbi tantiaidquo yec bēdamboshē iquec.
Nēid isec bēdambo iquebi —quequin
abucshun dacuēdampamboecnuc
chuipondash.

¹⁹¿Ēmbentsēquidambi Esus
chuiabanquin nape? Padenquo.

Ēndenquimboshē Esus chote
tantiamequin Nuquin Papan isadaidbo
tsusedpabo dada uamepampic.
Pacuēnēdacbimboen utsibon
tantienuquo icnubi
paposhquiacbimboecnuc Esus chote
tantiamenuen dada uamepampic. Aden
Nuquin Papan chiaid isec onquequin
bēdamboen tantianuna: —Muaquidon
chuisho tantiamane —queshun.
—Abitedishun Icbombo nebi —quequin
ismenuc padpidec Esus choabi
yacpadembi Nuquin Papan chiaid
bēdamboen tantianuna. ²⁰—Nuquin
Papan nadoendac —quequin ¿ambembi
chiaidta nuquin tsusedpabon dada
uapampic? Padenquo. ²¹Ambembi
chiaid dada uainquo icquin Nuquin
Papan chiaidquo dada uapampic.
Nuquin Papan Mayanēn tantiamiac
abimbo chuiampic.

Muaquido iquendac, quequin chiaid

2 ¹Nuquin Papan chiaidquo
isadaidbo tsusedpabon chuinubien
utsibo: —Nuquin Papan nadoendac
—quec muapampic. Nēbi adquidbidi
iquendac. Mibi yacno puduedash
ambembi chiaid chiec muasho
tantiashun: —Mibi muequi nec
—badedquo cainquo mimi iquendac.
—Abided ciudadec unēsaid Esus
tantiaquid nebi —queboedi: —Esusēn
chiacpadomboen natiapimbo iquebi.
Adshobi Nuquin Papan ēbi cuidenquo
ictsiash —quequin muaquin chiendac.
Adquid Nuquin Papan icsambo icquido
cuidacno nidmequin cuidendac. ²Aden
muaquidēn chuisho tantiashun Esus
tantiauidtsēchoedombi dadpenshun
aidēn chiaid tantiendac. Adashic
Nuquin Papan chiaid niac-niaquec
muaquido tabadacimboec padpidec
icsamboec tabadoaindac. Adsho isun:
—Esus tantiaquidobi icsambo iqueque.

Is —caindac utsibon. ³Muaquido tantienda. Aidon piucquid comapenec bunquin ambembi chiaidquio mibi chiec. ¿Muasho tantienquioda Nuquin Papan icpec? ¿Ada Nuquin Papa ushpec? Muasho tantiashun aido cuidendac. —Adquid icsano nidmequin cuidendambi —quequin ambi ëndenquimboshë tantiapampicpadomboen comapenen Nuquin Papan cuidendac.

⁴Ambi chiaid niac-niacsho icsano nidmequin cuidquid Nuquin Papa nendac. Ëndenquimboshë nidaid uabi icnuc ambi abi yacnoshon uaido mayan utsin-utsinquien: —Ëmbiquen abitedi namenu —quequin ambi chiaid niac-niacsho isun Nuquin Papan icsamboshë yacno nidmequin cuidpampic. —Chian anëdënquiacno nësecanumbi nabono —queshun aden tauamboen Satanas chedo cuidpampic. ⁵Adshumbic yuecquio ictanquin matses abitedishun ambi chiaid niac-niacsho isun nidaid abichobi mabudadmequin Nuquin Papan matses uesquin unës uapampic. Noeuidtsëqui padambo icpampic. —Bëdamboec tabadnuna —quequin Nuquin Papan chiaid chuibanquid icsho Noe chedo 8tedpactsëc Nuquin Papan cuidenquio icpampic. ⁶Adshumbic yuecquio ictanquin matses utsibon Nuquin Papan chiaid niac-niacsho cuidquin nëdëncapampic. Shubu dadpen icquid nëid daëd icpampic. Nëidic Sodoma caid. Nëidic Comoda caid. Ambo tabadquido aton shububëdi abucueh taboadampamboec paëdquidën pichiquepampic matses nibëdquio yec. —Aden icsambo icquido cuidquid nebi —quequin Nuquin Papan adopampic. ^{7,8}Sodoma caid yacnocquid abentsëqui Dod caid pichiquenquio icnuc Nuquin Papan cuemepampic. Bëdambo icquid

yec: —Nuquin Papan chiaid niac-niaquec nëmbo icquido icsamboecuidi tabadec —quec shubiec tsadsho cuemetsaidi pichiquiambo ictsampic. ⁹Aden abi tantiaquido daëd Noebëdta Dod Nuquin Papan cuidambo icpampic. Adem bidi nëbi abi tantiaquido cuidenquio icquid Nuquin Papa nendac. Utsibon chieshënaidi abi tantiaquido bëdambo icmequid nendac. Icsambo icquido cuidquid icquimbi matses cuidte ushë choabi icnuc nëbi tauaquin icsambo icquido Nuquin Papan cuidendac.

¹⁰Muaquido nadquio icsho Nuquin Papan cuidendac. Abi bunaiduidi naic icsaic. Adem bidi pabiate shëcuë nibëdadbimboen abi chuiquid dapan chiaid niac-niacquinc Nuquin Papan chiaid niac-niacquinc caic. —Con nauidtsëqui bunebi —queshun ambi naiduidtsëqui naic. Dacuëdtiadquidi dacuëdenquio icquin Esus tantiaquido chuiquid dapa caic: —¿Bëdamboen namequidta nedic? —quequin icsamboen chuishunec. ¹¹Padnuen Nuquin Papan abi yacnoshon uaido mayan bëdabon adec muaquido chuishuntiapimbo iquec. Muaquido bëdiactsëc tantiaquido icnubi comapenen tantiaquido icquin mayan bëdabon Nuquin Papa naden chienquio iquec. —Aido baded cuid, Papa —cainquio iquec. —Ambi cuidte ambentsëqui tantiaquid Nuquin Papa nec —queshun adoenuio iquec. ¹²Padnuen ëmbi chuiboedo muaquidon Nuquin Papambo tantienquio icquin Nuquin Papa muauaquin chuibanec. Adec icsamboec tabadsho Nuquin Papan cuidendac. ¿Ada bëdi cuidnushe quepadic? Padenquio. Adem bidi abi cuidte tantienquio icsho Nuquin Papan cuidendac.

¹³Nuquin Papan chiaid niac-niacmequin muaquidon utsibo

icsamesho Nuquin Papan cuidendac. Icsateuidi bunquieci inchëshën icsash badiadëntsen icsaic: —Bëdambo iquebi —quec adquido cuishonquec. Esus tantiaquin penuec mibi cho-choacno mibëd tabadec muaquidotsen chopac caosh. —Esus tantiaquidbidi nebi —quiash mibëd tabadec aid icsasho isash: —Esus tantiaquid abitedi icsaic —quependac utsibo. ¹⁴Muaquido utsin chido mëismec tabadec. Nuquin Papan chiaid niac-niaquec icsaic ënëdenquio iquec. Adquid icquin Esus tantiatsëcquido icsamec. Utsin chido chudquinc muaquin piucquid dadpen bedquinc caic abi bunaidquio naic icsaic. ¹⁵Nuquin Papan chiaid niac-niaquec icsateuidi bunquieci. Ëndenquimboshë matses utsi Beyod caidën mado Badan caid Nuquin Papan chiaid chuquid yequi piucquid dadpen bunec Nuquin Papan chiaid niactiadquio icpampic. ¹⁶Adnubien abi catsadaid cabayobitsecquid asno caid matsesbimboec onquiampampic. Ambi chiaidquio chuimequin Nuquin Papan oncamiac: —¿Atotsieshun icsamboen nai? —cac aton icbo icsanuec niduidboedi: —Aucbidi nidnu —quepampic. Adquio muaquido iquec. Piucquid comapenec bunec Nuquin Papan chiaid niactiadquio iquec.

¹⁷—Mibi bëdambo icmete chuinu —quequin muaquidon chuisho tantiash: —Ai, mimi chiacpadte bunebi —queuidtsiash matses. Uispa dadpen icboedi badiadnuc abu chëshën bëtinacsho isash: —Tanunquien badiadec —queuidac bimboec: —Ambi chiacpadquio bëdambo icnu —queuidtsiash matses. Adec muasho tantiash: —Adquid chian anëdënquiacno nësecaindambi —quendac Nuquin Papa. ¹⁸Adec muaquido abembi onqueuidequi

onquec. Utsin chiaid tantienquio icquin ambi tantiauidi chieci naden. —Mibi bunacpadec mibitsen icsata —cac Esus tantiatsëcquin Nuquin Papan chiaid nauidsëcquimbi abi icsaid ënuidboedi padpidemboeci icsaquieci. ¹⁹Muaquidon: —Nuqui bunaiduidi nanuna. Adec nuqui bëdambo ictsiac —quequin chuibanec. Adboedi abi icsaid ambembi ëntiapimbo yeci icsamboshë iquec. Adec icsamianquidën chiacpadomboen naic matses icsaquid nendac. Adecbidi ambi naiduidi naic icsaquid matses nendac. ²⁰Nuqui cuidmenquio icquid Esuquidistu tantiatsëcquin abi icsaid ënuidboedi padpiden Nuquin Papan chiaid niac-niaquec icsamboshë muaquido yanec. ²¹Ënden Esus chiondac: —Ai, aid tantiembi —quetsëccondaidi aden Esus tantienquio yanec icsamboshë yansho isun: —“Esus tantiembi,” quenquio icpatecnëdan —caimbi. ²²Adquid chuipanëdash naden. —Ambi ucbudaid opañ chequid. Opa nesmiaqui nidaidën nocoshquec padpideci bëchishoaquid —quepanëdash. Adecbidi Esus tantiauidtsëcquido icsaid ënuidboedi muaquid padpidemboeci icsadenechitequien iquec.

—Esus chote chiaid

3 ¹Tantia. Ëmbi tantiaido mibi neque. —Pabiate cuembo icquin Nuquin Papan chiaid tantiaquieci bëdamboeci tabad —quequin mibi chuiquin dada uaondambi. Adomboembidi mibi chuiquin nëid dada uanu. ²Esus chote chuiquin Nuquin Papan isadaidbo tsusedpabo dada uamepampid ¿ada tantie? Adomboembidi nuqui cuidmenquio icquidën Nuquin Icbo Esusën chuibanondash. Aidën chiondaid abëd ictened utsin mibi chuinëdash. Aden chiaid tantiata. Aidbidi chuinu.

³Esus nidaidën padpidec choabi icnuc Esus tantiesabon abi icsate bunaiduidi naquin Esus mamënsunendac. ⁴—“Utsi uanuec padpidec nidaidën choaindabi,” ñquenëdaïda chopec? Ma choenquio icpayoc. “Nëbi Esus choec,” quedenedi con mëdimbo abitedi unësbudniac. Esus choambobi —quependac Esus tantiesabo. Nadembidi chiendac.

—Taëc nidaid yanubi matses nidaidën tabadpampic. Adecbidi aton tsyuecquido tabadpampic. Nëbi adecbidi matses nidaidën tabadec. Ëbi nibëdnuc adiquendac. Utsi uanuec Esus choenquio iquec —quependac Esus tantiesabo. ⁵¿Abimboda capec? Aden chuiquin Nuquin Papan chiaïd tantienquio iquec. Ëndenquimboshë ambi uaidtedi nibëdnuc: —Ad icta —quequin Nuquin Papan chiac abu yec acte yec nidaid yec quiampampic. Acteuidpambo icboedi nidaid nënantan yampampic. Aden Nuquin Papan abitedi uapampic. ⁶Aden abitedi uambic yuecquio ictaniash matses icsambo icsho isun ambi chiacpadomboen ue dapa chomeshun nidaid mabudadmequin aid matses Nuquin Papan uesquin unës uapampic. ⁷Aden ambi chiacpadomboen Nuquin Papan naindac. Ambi icsambo icquido cuidte ushën abu nidaidbëdta nëdëncaindac. Adembidi matses Esus tantiesabo cuidendac.

⁸Ëmbi aden chiac: —¿Tedectsiash Esus chopeba? —¿quecta ique? Tantia. Mibi chuino. Ambi tantiapadëmbi Nuquin Papan Esus chomendac. Naden Nuquin Papan tantiec. —Dadpen seta icquid iquequi seta abentsëcbimboecquid nec. Adecbidi seta abentsëqui icquidquio iquequi dadpen seta icquidbimboecquid nec —quequin Nuquin Papan tantiec. ⁹—Ëdenquio: “Padpidec choendabi,” quenëdaïdi

Nuquin Icho Esus choenquien icchitec —quenubien Nuquin Papan: —Chiata. Cuidte bunenquio iquebique. Utsibontsen Esus tantiashun ëmbi chiaïd niac-niacboedi ënushe. Isbono. Ënacsho icsamboshë yacno nidmenquio ictsiambi —qeshun Nuquin Papan Esus chomiabi iquec.

¹⁰Adnubien matses: —Nëbi choec —quenquio icnuc Esus badedquio choendac. —¿Nëid ushëmbi ampequidën con na ampec —quequinda tantiapec? Padenquio. Adembidi: —Nëbi choec —quequin tantienquio icnubi Esus choendac. Choshon acquimboen toncac abitedi nibëdanendac. Uispa yec inchëshën ushë yec badiadën ushë yec queboedi nibëdquiecnuc nëdëncaindac. Nidaid abichobimbo nëdënquenuc aidën icquidtedi nëdënquendac nibëdquio yec.

¹¹—Nuquin Icbon nac adquidtedi nëdënquendac —quiash Esus tantiec bëdamboequien tabadtia. ^{12,13}Esus chobon Nuquin Papan cuidquin ambi uaidtedi nëdëncaindac. Abu yec uispa yec inchëshën ushë yec badiadën ushë yec queboedi nëdëncaindac nibëdquiecnuc. Adshumbic ambi chiacpadomboen abu chuca nacnenquinc nidaid chuca nacnenquinc caindac. Adoshombic ambi chuca nacnenaidën bëdambo icquidoudquio nuqui tabadmendac. Ëmbi aden chuisho tantiash: —Ma Nuquin Papan Esus chomenu —quequin utsibo tantiamequien Esusën naid chuibanec bëdamboec tabadnuna.

¹⁴Ëmbi tantiaïdo mibi neque. Tantia. —Choshon abi yacno Esusën nuqui tabadmendac —quec chieshtoenquio yec bëdamboec tabadnuna. Choshon Esusën: —Mibi icsambo iquec —cainquio icnuc Nuquin Papan chiaïd niaquenquio yec bëdamboec

tabadnuna. ¹⁵Adec tabadquimbi ëmbi
chuiboed tantiashun naden tantia.
—“Utsitsen ma Esus tantiaquid yanu.
Aden Esus tantiasho aid cuidenquio
ictsiambi,” qeshun Nuquin Papan
Nuquin Icbo chomiabi iquec —quequin
tantiec tabadta. Adembidi mibi
chuiquin nuquin buchibimboecquidën
Pabadon dada uapaccondash. Nuquin
Papan tantiamiac bëdamboen
chiaccondash. ¹⁶Ëmbi chuiboedbidi
chuiquin dada uadenepaccondash.
—Pabadon dada uaid abentse-abentsec
badedquio tantiadenquio iquec
—qeshun utsibon aidën
chiacpadomboen chienquien icchitosh.
Nuquin Papan chiaid niac-niactiadquio
icquidon Pabadon chiaidquio
tantienquio icquin icsamboen chiosh
cashnad-cashnadacbitsëcquiecnuc.
Nuquin Papan chiaidquio nuquin

tsusedpabon dada uapampidtsen
isbanshun adembidi tantienquio icquin
icsamboen chiec. Adquido Nuquin
Papan cuidendac.

¹⁷Ëmbi tantiaido mibi neque. Tantia.
Chuinu. —Abimbo tantienquio icquin
Nuquin Papan chiaid niac-niacquidon
muauaic —ëbi qesho tantiashun:
—Esus tantienquio yamane. Muasho
tantiatipimbo iquebi —quequin
ënenquio icquin Esus tantianuna.

¹⁸—Abi tantiaquid cuidmenquio icnuec
abided ciudadec Esus unëspondash. Aid
tantiasho Nuquin Papan nuqui
bëdamboen isec —quequin Esus
bëdiactsëc tantiatsëcshun comapenen
Esus tantiaquionona. Adshumbic:
—Nuquin Icbo Esuquidistu
bëdamboshë iquec —canuna ënenquio
icquin. Padi. Aidedi chuiquin dada
uaombi.